

Puspei saltar, paterlar e star da cumpignia

Ils locals da giuventetgna dalla Cadi han puspei aviert lur portas

Carmen Monn/FMR

Il Cussegl federal ha decidiu l'entschatta dil meins mars ch'organisaziuns sco la Giuventetgna Cadi astgan puspei porscher activitads als giuvens ed allas giuvnas. Il venderdis vargau han ils responsabels dil local «Pistregn» astgau beneventar rodund 20 giuvenils a Surrein. «La cumpignia ha muncau il pli fetg», dian entgins scolars e scolaras. Els seigien leds ch'els sappien puspei saltar, dar ballapei da meisa ni far cattavegnas culs amitgs. La promotura per la lavur da giuventetgna *Gabriela Cabalzar* (56) ei cuntenza da puspei saver porscher in liug nua ch'ils giuvenils san serevegnir dall'jamna da scola. Era els locals da giuventetgna ston els denton setener vid las restricziuns encunter il coronavirus.

«La cumpignia ha muncau»

Ils locals da giuventetgna ella Cadi han puspei aviert

Carmen Monn/FMR

Ils responsabels pil local da giuventetgna «Pistregn» a Surrein han astgau beneventar il venderdis sera rodund 20 giuvenils. Dapi gl'emprem da mars 2021 astgan organisaziuns sco la Giuventetgna Cadi puspei porscher activitads als giuvenils. Quei denton buca senza restricziuns. L'emprema ga dapi meins han ils giuvenils dalla Cadi astgau passentar lur venderdis sera els locals da giuventetgna. Era sch'il Cussegl federal ha gia annunziat gl'emprem da mars 2021 ch'organisaziuns sco la Giuventetgna Cadi astgien sluccar las mesiras encunter il coronavirus, han ils locals buca gest saviu arver. «L'organisaziun ei stada gronda entochen che nus havein propi saviu arver», di *Gabriela Cabalzar*. Ella ei promotura per la lavur da giuventetgna e la responsabla pils treis locals da giuventetgna ella Cadi. «Nus havein stuiu elavurar in concept da proteczion per mintga local ed essan stai en stretg contact cullas vischnauncas pertuccadas.» Actualmein astgan 24 giuvenils visitar ils locals da giuventetgna a Surrein e Sedrun, ferton ch'il local «Cons» a Mustér astga pervia da sia grondezia mo beneventar 15 mats e mattas.

Buca bia program

A Surrein el local «Pistregn» han ils giuvenils la pusseivladad da passentar lur temps en cumpignia. E quella purschida nezegian els era: Il venderdis sera fuvan rodund 20 scolaras e scolars presents. Il local ei situaus el sutterran dall'anteriura casa da scola ed ei adattaus da saltar, dar ballapei da meisa ni paterlar. Semplamein da guder la finiziun dall'jamna da scola. La cumpignia hagi muncau ad els il pli fetg, tradeschan quater scolar(a)s dil Consorzi da scola Sumvitg-Trun. «Il saltar e tedlar musica ha era muncau a nus», dian las duas giuvnas *Maria Bosshard* (14) e *Luana Wolf* (13). Lur dus collegas *Samuel Flepp* (14) e *Rafael da Cruz*

Soares (14) aschuntan: «Igl ei bi da saver ruassar dall'jamna da scola e da far catavegnas culs amitgs.» Alla damonda, tgei ch'els hagien fatg enstagl da s'entupar el local da giuventetgna, dian els: «Nus essan tuttina s'entupai giuado per buca stuer desister diltut dils collegas.» Era Gabriela Cabalzar ei dil meini ch'ils mats e las mattas basegnan il contact cun persunas dalla medema vegliadetgna: «Ei drova buca bia program per cuntentar els.» En scola hagien els gia da luvrar vid differents projects ed aschia gaudian els da semplamein saver «esser». Tuttina dat ei mintgaton seras da giugs che la dunna da 56 onns organisescha ensemen cullas menadras ed ils menaders dils locals. Ina dallas proximas gadas san ils visitaders dil local a Surrein per exempel emprender co dar troccas. «Quei ei stau in giavisch d'entgins giuvenils», di Gabriela Cabalzar.

Saltar cun mascrina

Senza restricziuns e mesiras encunter il coronavirus astga denton buca vegnir fatg diever dallas localitads. Tut ils presents ston purtar ina mascrina e desinfectar ils mauns. Era da magliar ni da beiber astga buca vegnir reparti sco usitau, di la dunna da Sumvitg. Las giuvnas ed ils giuvens para la mascrina denton buca da disturbar grondamein: «Ins s'endisa vidlunder. Sulettamein da saltar eis ei empau malemperneivel», di Rafael da Cruz Soares. Duront il temps ch'il local ei staus serraus ei Gabriela Cabalzar stada premurada da porscher in program alternativ: «Nus essan stai pliras gadas a patinar a Mustér, Sedrun mo era a Trun.» Pil futur giavischa la promotura per la lavur da giuventetgna ch'ei seigi puspei pusseivel da realisar projects organisai dalla Giuventegna Cadi. Denter auter ei quei il cuors da «babysitter» ni dis ensemen culs pumpiers. Il mument ei Gabriela Cabalzar denton leda da saver porscher allas mattas ed als mats ina sera ad jamna els locals da giuventetgna.



Maria Bosshard, Luana Wolf, Samuel Flepp e Rafael da Cruz Soares han plascher ch'il local da giuventetgna ei puspei aviarts.

FOTO CARMEN MONN